

漢陂集

一
函
八
冊

鄧子修藏

PDG

洪岐集卷十一

碑

明故壽州處士薛洪墓碑

予同知壽州之明年始覽郡志蓋郡中父老十人者嘗相率爲嘉樂會而畫圖歌詩稱述志意有古之風焉于是訪求其人獨李瑄在其九人者蓋相繼凋謝之日久矣又嘗論其世而郡學諸生咸曰薛洪李瑄張紳三者其亦可謂嘉樂焉耳矣又明年壬申春上命壽州同知致仕歸其鄉會諸郡盜起道不通而留滯于壽于是洪之從孫鑾蓋諸生從吾游者請書洪墓道之碑按古

伏愿而隱曰處度法比義洪殆庶幾矣乎故稱曰處士
云碑曰處士薛洪字宗海壽州人也壽州在中都西南
隅山水險固而俗尚禮義顧善釀酒酒甚美而賈復
易歸人故崇于飲不飲者盖少洪則不飲而服田力耜
以養其父母父母歡樂之命之而飲亦三二爵輒止不
多飲迺以其暇讀宋司馬氏資治通鑑諸生號精熟者
與之論難稱說往往出其下于是屈伏而共推先洪就
辨問焉盖專精如此後又讀真氏大學衍義未終卷而
老病作不能復讀然猶不肯釋手少年經生弟子嬉遊
汗漫迺或不能及之其父母喪盖就外寢者凡二十七

月喪禮倣諸古不奉佛徼福如世俗者之爲從子瑄仕
爲孝陵衛知事廼一旦病死不能歸遣子琛歸而塋之
存恤其婦子此二事人亦稱之至今而曰孝慈云鄉飲
酒禮洪位在三賓有司敬重之呼曰鄉老而不名其爲
嘉樂會也與其九人者迭爲賓主或于其家或湧泉諸
勝處而飲酒爲樂甚歡蓋至是始稍稍近于酒矣李瑄
善詩歌洪與張紳亦頗解而行亦相埒故又稱爲三老
云同知會稽董豫嘗以米肉餽洪而致書曰方春萬物
和煦而吾民之長老顧無以悅樂志意責在有司敬以
米肉若干佐子孫饌具老人其乘時康樂無恙知州東

郡劉槩旣去任久猶每每存問洪亦稱曰鄉老槩特立不群者也而豫亦剛廉然其在于洪者則固若是也乙丑秋洪年八十一會上新卽位尊禮兩宮詔民年八十五曰老病卒而塋于城南七里之原其年七月二十一日也洪娶吳氏今年九十尙存無疾病子二人琛瑗女一人嫁爲王洪妻孫男二人琛嘗奕棊不事事洪怒廼投棊于火而琛由此修飭今亦復爲鄉老云銘曰

維奚仲析疆處士遂延于楚代有碩人至于居州爲公子後以啟爾祖爾祖巍巍弗耀于行曰吾孫子孰發爾

之祥孰申爾之萌亦曰其靖共哉維爾允和克敬于身
以立爾家曰吾祖是吼壽春城南七里平原廕廕爾墓
在于斯過者則式蓋衍于後祀矣嗚呼爾哉

明故處士呂公墓碑

公諱鑑字某西安高陵人也其先出自成周太公封
而居呂厥後諸裔乃遂爲氏其在高陵者歷籍漢唐文
獻遐邇弗能徵諸追及有宋有諱世昌者慷慨激烈超
躍弗群蓋嘗吊季代之委靡慕雲長之英烈模鑄金刀
象其平生置之祠廟而識名其鐵至今觀者罔不歎息
俛諸國士之風焉由斯以降有諱彬卿者其距世昌系

次莫究生于三人其長曰大其次曰十又次曰珪通經
發跡作邑于洪大之行八人乃特稱而淳樸慙直聞言
不信洪武之初役司學庠乃以勵節發戍于北平永樂
之初改縣于齊東其諸裔留者綿綿延延彌久而昌興
高陵敵矣生有三子其長曰興體幹魁梧腹如抱鼓言
論便便不離中公嘗爲郭下老人接詞善聽民以不爭
返梁氏之遺金塋親之朝乃值祁暑獲其沃水之報籍
以弗死興生二子其長曰貴弱齡補戍綽有勇略督役
伐木棟梁京觀尋移靖虜被知元戎擢爲總旗乃佐金
湯之績濬甘源之利興帷薄之俗破穿窬之穴貴寔生

公及其三子清鍾暨文鍾乃績學爲祁縣丞蓋呂氏之
興代有懿德延及公世日益隆茂惟公體貌魁岸鬚髯
踈秀粹出天秉聰哲內韞夫其器量淵邃物至有容而
服誼之節剛亦不吐蓋嘗訟割枕之誣以折宗人之強
遠悔慢之跡以召敬恭之心仁勇具備直而不餒至于
息李氏墮嬰之禍遷曾祖母崇立之塋誼所宜舉不以
貧沮忠謀之施具出腎腸可謂惠洽隣比恩覃枯骸者
矣而又欽詩書之族崇耄耄之禮明農圃之務嚴涇渭
之流懷德畏刑老且彌篤于時冠帶之徒杖屨之老申
同德之嘉盟嚮山林之高蹈者彬彬焉雍雍焉土垣茅

笑之下獲覩夫康衢擊壤之遺風也爾乃搗謙抱冲
夕惴惴若涉淵水罔敢或易培深履遐享年八十有四
以弘治戊午閏十一月某甲子老終正寢公配夫人
氏繼配劉氏咸以貞淑柔嘉孝慈勞勩克相于公蓋
孟女之禮伯鸞歸婦之賓卻缺幾以過之魏夫人生
二子其長諱溥率禮秉誼世德作求其次曰恃璠三
子其長曰枏德醇學粹對揚皇猷天子休之擢進士
一授翰林院脩撰進講經筵乃又覃恩錫類貽封
光于邦國刑于四海其次曰梓又次曰栖苦心篤志
學類子不幸早卒傳生二子其長曰楊泰

曰欝栲生子田騶虞之仁少則成性其餘曾孫三人亦
皆蘭茁蕙芬漸而莫禦者也公塋城北海逾二紀惟夫
表墓之碑有關載德之辭未述遠邇同好永懷念慮靡
所由申栴櫟括前事謀諸九思載考往代逸民處士或
畊巖石之下或隱卜肆之內或邁往以潔體或完德以
渝民方之于公時乃或殊隱則均矣若乃含精韞和閤
而勿露上龔累葉之鴻休下振百代之丕緒惇太寬裕
博厚悠遠罕有見其如公者也是宜昭銘景行掇實去
華發潛德之幽馨顯令聞于不朽其辭曰

煌煌厥呂肇自有周裔于高陵寔繁且悠烈士顯名有

赫劔矛翕而勿散貽厥孫謀四世九人名德嗣興或瞻
臨仕或戎或畊世澤之覃于公是凝於休維公令德彌
純生枯拯殛戢侮廣仁丕承厥祖祐啓後人元子義義
乃有家孫歸根祖源維公之教朱綏方來哲乎有曜爰
茲勒銘萬禩是告

重修河東陝西都轉運鹽使司廟學碑

惟茲廟學之建多歷年所日貼于危上雨旁風神栖靡
寧官師失據士妨就業行側載塗靡所于告乃正德丁
丑春監察御史南昌熊君某祇承上命視鹽于茲入謁
殿廡退即講堂顧瞻既久怛然疚悚于是日集公羨出

市材木與其硯瓦黝堊之飾既合既盈卜日興事士良
吏能細大偕休甫踰旬時舊晉維新公乃釋菜對越于
先師神貺歆格洋洋若臨士各就舍孜孜欣欣弦誦之
音溢于里巷君以其暇訊德考業大豁厥蒙藹乎時雨
之滋而春風之襲也安邑知縣張鏜睹茲盛美使人于
九思令具撰述傳載不朽惟河東之地帝都之故墟先
王之遺風在焉考之詩可知已然凡民之性因世乃移
豪傑之士不變于俗故士者之志立然後百姓之道勸
禮義之學明然後士者之志立庠序之地興然後禮義
之學明故曰建國君民教學爲先然今天下委質之臣

由學之士宣政于列郡持節至四方非不多也若乃指
意庠序善誘士人蓋亦見其罕矣惟君粹發天衷學有
源委毅然興道尊崇孔氏克敦于行所以作人禪化佐
天子而竭使臣之職分也惟爾多士來游于斯被明公
興作之化負河山靈毓之氣服孔氏綱常之訓勵萬代
忠孝之節居則善俗出爲名卿奮跡堯舜之墟予以珥
成唐虞之治不亦休哉昔者文翁興學蜀人詠德韓愈
造士南方頌焉以今揆昔益隆且茂是宜述錄偉績播
之昭銘勒諸玄石庶幾悅豫士心而焜燿無窮者也其

辭曰

於休皇明式古，建學菁莪，載詠嗣周。其作惟茲河東，雄峙一隅，匪肆于四國。運是需乃作泮宮，文教以敷。俊士聿興，爲國之瑜。歲序既遷，宮墻其顛。神栖于危，士離而歎。謗謗熊君邦之司直，泣斯睠斯，爲我心惻。出羨貿材，惟吏之飭百工，畢藝庶民，展力既作之堅，亦落之棘。曰宮曰室，戢戢翼翼，多士循循以游，以息。含英毓粹，賓于王國。誰其作之，繫君之績，勒銘于宮，垂示罔極。

新脩河東陝西都轉運鹽使司鹽池周垣之碑

益于民用，功埒五穀。然自糞交徐揚，至于江浙，又南至于閩廣，又至于荆梁滇南，諸郡罔非由人而作。黜幽而

成者也惟河東之勝湧水爲池幾二百里祥飈拂拂來
自東南水膚凝結如瑤如瑜望之瑩然取之復結蓋覆
載之奇寶生民之鉅幸也于是全晉之地以及雍豫蜀
漢之交悉仰于此國朝建制乃于池之西北安邑之墟
樹之運司官之長貳因地以興利執券以御商權課以
供國流販以裕民上令下靡公私具足又歲命監察御
史一人賜之璽書往蒞其事若官之臧否鹽道法不法
悉以憲度從事正德丁丑南昌熊君寔當其任下車三
月剔蠹摘賴威行惠流乃守池之卒日以盜至刑之弗
已君乃往闕短垣及肩莫能扞禦于是喟然歎曰細民

見利而弗動非情也以國利與盜者慢也誨盜而殺之
非仁也乃歸而下令郡縣諭其長吏達之父老欲爲推
故鼎新一勞永佚之策郡縣以其長吏父老之意咸復
于公曰謹如教公于是又下令曰戒爾役徒具爾版畚
輯爾工材其以五月之吉有事于池上敢後者罰又簡
其吏之能且良者授以方略俾之往督而曰更其勞佚
時其飲食垣之欲堅門之欲嚴其以十月之終卒事乃
各應命曰敢不謹興事之晨君乃躍焉往勞其人蓋執
役者幾三萬罔不欣喜爭趨于先及期而役完蓋垣以
屋計丈有五尺高倍三之一圜如池之闊而加多焉其

外爲馳道爲隍其深廣各如垣之厚有水環焉門之南北西向者各一其上有樓以楹計者各三其樓之相距爲鋪者六十以楹計者各一凡門與鋪各以數人守之于是昔之盜者周視其外仰首歎息無可奈何乃各散去爲農與商守卒夜卧警柝不聞其郡縣之長吏相與謀曰惟茲池之故重利所委盜賊踵至日殺人于庭間或畏死驅良民即鋒刃損公家之利害非細故惟君洞視遐覽有超世之智好謀善斷有道義之勇滋樞以給公上有體國之忠渝寇爲良有子民之仁惟我一二有司目擊其休使其氓氓罔聞于後罪則曷歸其安邑知